

四庫全書

子部

欽定四庫全書

子部

黃氏日抄卷九十七

詳校官中書臣康綸鈞

侍讀臣孫球覆勘

總校官進士臣楊懋珩

校對官助教臣胡予襄

謄錄監生臣鍾廷瑛

欽定四庫全書

黃氏目抄卷九十七

宋 黃震 撰

墓誌銘

廣德縣尉趙君墓碣

君諱遠字任道曾祖諱賡祖諱大年不仕父諱居義以
長子今主管鴻禧觀逢龍貴贈朝請大夫君亦以鴻禧
恩為廣德尉景定三年四月二十有七日卒于定海縣
並先塋之廬鴻禧命以其仲兄次子榘為之後明年十

月七日槩奉君葬慈溪石臺鄉之嚴嶼既葬碣墓千里
請銘於某曰吾父幼嘗刲股活其母長魁國子監以雜
犯黜遂棄科舉學鴻禧任之官強而受受逾年即棄官
歸平生不娶不畜奴婢閉戶日夜讀書自娛飢則手炊
既飯輒復讀以終其身然時推伏臘餘濟貧者凡皆公
至行而世或以介僻疑余曰嘻果介僻耶乃銘曰

移孝於忠身可殺也曾謂親危愛膚髮也君生而能
性天發也試不偶期已仕不可則止全其無愧者歸

之曰予兄既有子百行胥此焉達也嗚呼正可為世
之鵬梯滑稽覲顏白華者怛也

提幹文林趙君墓誌銘

淳祐九年秋余始寓居行都北關監稅田君穆騷人也
與鄰壁一夕招余文字飲坐客有年少俊發能粹然以
謙自持者余察而異之問之宗英也其字叔茂至是以
明經連三領薦書田君屬杯賀之爾時余亦應試方見
黜於有司叔茂不余鄙與余語歡若有雅故亟取所試

文字示余相與立燭疾讀見其理鑿鑿而文皎皎為之
斂衽降歎遂定交明年叔茂登進士乙科調温州樂清
尉再調平江府錄事參軍余皆預賀客祖送之列已而
余亦得官東歸而叔茂監穿山鹽場與余再會於鄞未
幾辟淮浙發運司從事復與余同仕於吳日益相好越
五年余官中朝而叔茂自徽州錄參終更舉其改官者
已四人得幹辦淮東提舉茶鹽司公事訪余話舊余方
幸其將通籍駸駸顯仕益濟民矣迺俄以疾卒于家其

孤囑其父之執轉求余銘余曰嘻尚忍銘吾叔茂也耶
為之求者曰不然叔茂不幸仕不顯非子知之素其疇
為銘耶余曰不然叔茂雖仕不顯其所存者有足顯於
世者豈余之所能銘耶辭再三不獲迺為次其事而叙
之叔茂諱崇禪熙陵九世孫曾祖不赧蘄州防禦使祖
善恬武節大夫江南東路馬步軍副總管父汝棟儒林
郎監行在左藏中門叔茂平居疎快坦直及臨政鎮密
而振奮所至有能稱其在樂清手捕劇寇全大辭不受

賞曰吾職耳殺人榮身忍乎修邑西塘六十里民至今
賴之其在穿山民不擾而課溢額其在發運幕於勢利
無一毫染其在徽日夜疏理獄無留訟民自以為不寬
郡事多倚決焉其才有過人者矣而皆本於至孝初叔
茂幼孤母劉督教之感勵刻苦稍長求太學名士之精
於治書者師事治徧既第母謂汝父嘗尉樂清亦尉樂
清穿山多海風母不樂之即請檄奉以歸前後為獄官
必務陰德曰體吾母之心歷官九考而產業之廢幾半

則其廉又可知矣嗚呼孝且廉若此而又才足以行其志使叔茂壽其有益於世當何如而天迺奪之遽耶蓋君得年纔四十八其生以嘉定辛巳十一月辛丑其卒以咸淳戊辰四月戊申其藏於安吉州武康縣金龍山祖塋之旁葬以卒之年八月丙午娶劉氏男四人必德必熈必勳必昌女三人必昇次必鼎許嫁沃會龍必良尚幼先是君命諸子試宗庠君卒三日而旗鈴至必熈占

前名銘曰

神明之胄兮積慶之長再世儒科兮曷猶未昌庭柯
雖改兮蘭則芳往者不可問兮來者未可量

致政修職孫君墓誌銘

山川扶輿清淑之氣未有不發舒於人物之英然非發
舒之難成全之難也否者天非人不成况地靈乎四明
山夕陽在餘姚縣西南六十里崖斷瀑飛山翠欲滴鬱
鬱乎望而知其為人物淵藪矣及迹其衣冠鼎盛乃纔
四十年豈非有係其人者而然哉初山之間有孫氏自

唐長官以來世居之然惟讀書養性家傳樸厚未嘗與世相聞積而至我朝乾淳間乃生魁特是為學諭諱某始刻意科舉期大戶門聞慈溪方先生達材之賢而禮致之妻之女授之屋率其族使皆執經就弟子列學諭三子因益秀拔修職君其第三子雖以後其叔父而剛采有立性行尤絕類學諭又能繼成其志方伯仲氏以其師之說講授於家君則綱紀其旁凡子弟之就學及學成而策勲者既仕而待選皆有助及伯仲氏既亡則

又創爐溪文社躬自督課之如頃者太常卿子秀與武學博士炳炎大農承嘉皆君之子孫行遂彬彬輩出而方先生之子山京實君之甥亦魏踐世科擢進士第一人其餘族黨姻聯接踵上第幾不容偃指文聲官業往往與山川相發揮果地靈耶抑亦成而全之者人耶余自端平甲午讀書餘姚已徧與孫氏交嘉熙丁酉冬君又禮致余西塾尚及識學諭公年已九十龐眉碧瞳猶拳拳其族之人讀書亦親見君方上承下接其間時惟

太常公方登科餘皆方讀書晝夜聲相聞余謂此如巨木春回芽英澱澱華實而蕃大也將孰禦已皆果然因每默念其淵源之所自未嘗不三歎三詠於君也俄一日以訃聞余既悲之其孤復走介乞銘於余余又重悲之曰其何忍銘君然知君深不得辭也君諱一元字季良曾祖諱某祖諱某父諱某即學諭所命為之後者君年甫十有五即執其喪哀毀如親生經紀墳域老於世事者不能及事母以孝聞母惟二女鍾愛之貲產歸之

者什六七君一一體承無違及卧疾侍養衣不解帶送死禮彌厚買田五十畝以給其塋始祖塋嘗為寺僧犯其禁獨君討治不遺力後有欲治墳其旁者君又起力爭之有司幾行之過賴其人素賢聞即自悔而全護之君亦怡然相與使數百年松楸四顧皆雨露春由君一念之孝之推也君方壯時負笈京庠每試輒中的兩上橋門皆成鵲退即曰大丈夫豈必仕而後為政也哉歸而撫其族凡姪若姪女孤者嫁娶之出而視其鄉凡歲

祿有告乏者賑給之益修學諭公所結義役銖積其餘
將別置班并代下户凡大小保長之役而鄉或有犯義
敗俗者輒切責而禁止之由是宗族鄉黨無不憚其嚴
而感其惠嗚呼向使君得設施當世所謂使平得宰天
下亦如宰此社肉者不其然耶然君蕭然超特士也曾
不以窮達二其心築堂曰齊壽闢室其西曰怡偃書院
日與親朋觴詠其間詩思清婉非屑屑晚唐體而自與
四靈合才之得於天者如此臨終之日尚手題桃符詩

入寢室即奄然不疾而化嗚呼使君非素有得於此者
又疇克爾耶君生於淳熙己酉六月二十六日卒於咸
淳戊辰正月一日享壽八十以男子辰入學恩授迪功
郎該今上登極恩循修職郎初娶趙氏藤州推官某
之女繼亦趙氏壽已八十二四男皆其所出長曰子雲
先君二十年卒次子瀾嘗繼朱氏既而閱南軒徐氏一
樂堂記感父母俱存復本姓之為樂也歸侍如初惟歲
時別室祀朱氏次子辰太學習是齋進士次子瑾鄉貢

進士以繼叔父某之後孫男八人忝國子監進士次森
磊鑫藥壘次文翁添老出繼孫女二人曾孫男二人孫
女一人皆尚幼諸孤以臘月二十一日丁酉葬君四明
鄉金鵝山之陽銘曰

赤水之陽兮丹山之旁烟翠之居一簇兮宦轍之交
四方不有魁特兮孰開厥祥君實世其德兮澤流愈
滂種而不自獲兮所存者長恩洽于家兮惠積于鄉
施無不報兮子孫其昌增高而益深兮尚世世其母

忘

東堃翁迪功王君墓誌銘

寶祐三年八月十六日越長潭王氏東堃翁卒翁之嗣
太學生仲淵既奉之葬謂未足妥吾親也未銘越十五
年歲淳己巳歲六月壬午得地會稽縣太平鄉小江東
山之原而遷之山水秀拔與謝太傅故隱相望曰是足
妥吾親矣始乞銘於大參楊公棟楊公謂余而姻也銘
有嫌為狀其行使他求銘辛未歲二月仲淵屬其子鄉

貢進士元春以其狀求於越之員外丞黃震震驚曰揚
公天下士不銘而求銘宵人乎辭再三不獲則一惟楊
公之狀述焉翁諱惟寅字賓叔其先晉丞相導也導二
十世曰超孫為梁武毅將軍超孫二世曰元凱為隋剡
縣戶曹戶曹葬剡武毅夫人杜氏葬長潭長潭舊屬剡
王氏遂為長潭著姓曾祖迪功郎諱迴以翁之季父今觀
文殿大學士修齋先生登政府恩贈太保祖承奉郎諱
思文以翁之季父吏部侍郎所該恩贈通奉大夫父諱

夢庚道誼自娛不求仕西山先生真公嘗為誌其墓母張氏以寶慶東朝恩需封孺人翁生十五歲而孤慨念其父平生所交皆乾淳大老日以其舊得於耳聞者踐諸身與師友講求必於道德性命發為文章得古法度者特其緒餘故能事母孝律已正推之親族間里盡誠應事動必中理親族間里皆憚其嚴而服其誼晚歲卜山水勝處蒔花種竹延師教子時與親朋觴詠其間自號東塾翁得年六十有二以仲淵入大學恩補迪功郎

娶周氏封孺人翁方宗族鼎盛蟬聯赫奕時獨蕭然有
出塵思庶幾晉王謝風流而又適以晉丞相孫得地東
山與謝太傅故隱相望是豈容不銘銘曰

元氣渾淪賦予萬物得其全者扶疎勃鬱豈惟大本
聳梁棟姿必有枝分助之清竒昔晉王謝流風蕃衍
王導相國凝之幽遠謝有太傅亦生庭蘭一氣之全
流暢其間王氏再興長潭之上功名大節天下之望
有退而藏東楚之翁蕭然遠韻亦允厥宗其宗孔華

其人孔好何斯山川乃稱宅兆小江之濱東山之原
太傅故隱相望萬年

臨川章府君墓誌銘

咸淳七年余叨守撫州適歲大稔首舉饒止翁平糶齊
民于孫鼎貴之事以勸有粟者鄉長老或言豈惟止翁
如朝奉章公庚寅歲稔積雪中掃雪熾火以延糴者民
歡如雷今其子教授君躡高科亦駸駸乎貴顯矣獨不
足為勸乎余問教授君為誰正余同年進士為余勸分

於鄉鄉民所賴以全活者也。已心悅之，欲紀其事，未暇。爾明年春，教授君之官訪余，言別忽出顯文閣學士趙公汝暨所為朝奉公壙記屬余為墓銘。余謂墓銘本非余敢僭若舉積德之報以勸，則正長民者責此不容不書也。因取趙公所記閱之，朝奉公性至孝，嘗刲股以愈母疾，嘗卜居得地，改以葬其父。曰寧吾無家，毋寧吾父無吉兆。鄉鄰有訟者，以理論之，即止。有遇崇蹟於路者，提耳呼之，即甦。是孝弟之行，不惟人所敬，亦鬼神所敬。

豈不尤足以勸亦不容不書也公遠祖名瞻初與晏元獻公之祖皆今之瑞州高安人善地理之學同遊臨川各尋葬地晏之祖葬沙河公之遠祖葬橫嶺故老相傳謂於葬法晏之後當顯章之後當蕃已皆果然地理之學雖非余所能知如天之報施善人則昭昭可攷元獻晏公勲在社稷子孫至今猶未艾公之家傳且十世而德益修子孫今方興是又足為世德之勸皆不容不書也公之曾祖從吉從吉生成績成績生賢賢生公諱文

煥字明叔娶饒氏子二長名節早世次又新即余同年
今從政郎教授建昌軍孫曰庶孫公之卒葬歲月已見
壙記者不再書銘曰

天之生人心均此仁視人之飢舉切吾身何斯不仁
秦越相視擴而充之蓋由親始溫溫章公孝于而親
閭里化之至通明神遇飢發廩克廣厥施自仁而推
蓋其餘事仁者必興天道則然有子高科遂彰厥先
惟公先世媿美晏氏各求吉兆以開後嗣晏有元獻

又銘鼎彝公繼之興乃昉于茲有德則昌孰先孰後
作此銘詩以勸永久沙河之晏橫嶺之章於萬斯年
永永相當

史館校勘奉議毛君墓誌銘

文章意氣之士多疎於吏才吏才誠優矣又往往乏雅
韻余平生察所識能兼之者惟毛新甫新甫幼敏悟強
記甫十歲科舉業操筆立就既長好班馬文陶韋詩文
思水湧山出變態天成四方名士過門即相與樽酒共

論窮日夜不休或醉墨淋浪則文章愈得意平生以此
為最樂事俸入惟此之俱空不留一錢所謂文章意氣
之士非耶然其居官精密所至有能名初尉西安有囚
歸自郡獄折脅死以誣里正初捕時毆折者新甫計其
距初捕已十六日實則出獄而監守者毆折之遂雪其
冤有爭折膊而易骨蒸驗者骨之大小長短同衆莫能
決新甫秤其所易骨較重一錢半乃取叢冢中折骨私
易之爾遂辨其誣嘗攝龍游有訴相害者詞至再三不

受貪守無得以為閭里災其後為浙西常平司從事其
長有欲獻羨餘四十萬者新甫力爭以置社倉惠民又
有賣錢氏獄者又力爭後使者至卒得直無錫縣有獻
缺役田入和靖書堂者又力爭役得不廢凡其切切救
民乃多類此余故敬且愛之自浙西同幕府咸淳丁卯
同入館明年同考禮部試且官廨與連薨居情日益親
方期其顯用於世有忌者俄去之余亦隨補外遙相念
也卒未春有詔新甫再入館余方喜其此行必顯用忌

者又復沮其來人多為新甫扼腕新甫聞之泰然無幾
微見顏面未幾疾革卒于家越壬申冬其孤不遠二千
里乞余銘嗚呼其何忍銘然余知新甫深又何忍不銘
故為序次而系之銘新甫諱鼎新台州黃岩縣人曾祖
輔祖幾父居厚世以儒學聞於鄉新甫生於開禧乙丑
正月癸酉甲辰歲入太學登丁未進士第歷西安尉興
國軍教授浙西提舉茶鹽司準遣改常平司準遣臨安
府學教授除史館檢閱主管華州西嶽廟除史館校勘

咸淳辛未三月壬午卒年六十七娶鄭氏子男三人公
大公弼公溥皆力學能世其家女二人長適其甥素自
成次適登仕郎陳續孫孫男三人汝礪冠生沂生有遺
文文說若干卷詩若干卷雜文若干卷藏于家某年某
月某日葬縣之方岩鄉南與之和尚塘公平生文章意
氣如此吏事如此分教興國及教授臨安府務以義理
淑士習在史館筆削尤有法聲譽甚都不料其止此也
乃銘曰

騏驥一日千里兮不可使代耕雞之司晨旦旦兮不
可以翱翔嗟公之氣軼俗兮落筆爛其成章乃悉心
於民隱兮澤所至而下露亦既駸駸而向用兮誰歟
却之而退藏退藏兮積彌厚其在後之人兮未央

新喻縣丞修職張公墓誌銘

余咸淳庚午秋護試紹興府初識考試官張君天瑞聞
迺翁縣丞公之賢欲見恨未能越三年君忽訪余撫州
則縣丞已下世乞余銘其墓余既悲之且以其遠來不

得辭遂次其事為之銘縣丞諱某字某其先開封人唐
賢宰相諱文瓘之後有號張三公者又自歛之黃墩遷
饒州德興縣四傳至大理評事偕家始再興其長子汲
仕至殿中丞其第三子潛傳三世生燾仕至參知政事
謚忠定公今縣丞公則評事第二子日宣之六世孫其
曾祖名南夫其祖名珪其父名萬中萬中贅余氏縣丞
公生外家少長力學年二十一薦于鄉以屢舉恩寶祐
四年授迪功郎調緡雲縣尉清若自勵一意為民長官

凡民訟多倚之浹部使者亦剡薦諸朝民至繪像以祠
秩滿再調新喻縣丞未之官該今上登極恩轉修職郎
俄苦風痺咸淳七年某月某日卒于家年七十三公孝
友忠信且少負異才乃五上春官不一售非命耶然老
益堅三對大廷直言無忌雖再屈不少憎士果命所能
制耶然矯矯出仕勢如老驥方振鬣胡遽嬰疾僅再調
不果行士亦終如命何耶然公平生以振起家學自任
仕雖不顯而學益昌子孫衮衮方且代之興終亦非命

所能制也公娶朱氏子四人長即天瑞某官次廷瑞次鳳孫以後外氏次龍孫以後胡氏女一人嫁迪功郎衢州西安縣尉趙必嬰孫男四人史老禪孫

闕

祖德某年某月某日葬公姜塢先塋之

旁有詩文數百篇藏于家銘曰

水萬折勢必東時細流忽混同山蜿蜒起復歇脈隱
隱為四列唐宰相偉張公迨我宋綿無窮嗟縣丞命
雖膏學益昌耿不息續既往開方來何可量於休哉

陸大博墓誌銘

國家設科發策正以伸天下敢言之氣一有拘忌有司
反先喑無聲嘻可歎已然於斯時也有能獨諤諤其間
豈不誠竒士哉紹興間秦檜之當國有司無敢言時事
高彥先獨昌言之寶祐間丁子萬當國有司又不敢問
天下事陸先生又獨昌言之皆所謂竒士也然秦丞相
當國久高彥先被竒禍丁丞相不旋踵敗陸先生竟獲
免士固有幸不幸歟然高彥先雖被禍後數十年朱文

公出為請贈典於朝廟食歸然至今凜凜有生氣陸先生雖免禍當時獨大參陳公鞞目擊其事而薦獎之公歿今將二十年未有繼之發明者果孰為幸不幸歟然君子為世道慮寧願其為陸先生磯激方露已平流漫無迹不願其為高彥先孤標傑出於繁霜夜零之餘也余故於陸先生之事重有感先生早入太學每試必第一聲名卓立流輩天下爭誦其文如快覩翔鸞竒瑞余尤所酷嗜之謂先生之文曠世不一見所謂讀其策如

其必能措置天下大事者而恨未得望下風歲在辛未
余守撫州正先生寓里喜而亟造其廬則先生久已因
目眚然聞其議論之宏偉駭其記誦之如流尚猶崢嶸
當世者莫及也信竒士矣撫州適歲稔賑救之方多所
見教已而余叨除常平使者又除提點刑獄凡民情風
俗之要見教尤悉非疇昔究心當世之務者不及此也
益信其竒士矣未幾先生俄不疾而化余哭之哀及余
東歸其孤追及余江東道上乞余銘余不忍辭也行次

黃竹叢旅舍即次其事而銘之先生諱鵬升其先山陰人曾祖憲遷蕪湖祖宗周遷盱江父守謙贈宣教郎始遷臨川先生遂為臨川人登淳祐七年進士第調全州州學教授攝靜江府興安縣再調福建轉運司幹辦公事除國子錄遷太學博士以疾丐外添差通判潭州尋丐祠凡四任主管仙都觀以終其在全州創立小學增闢湖湘書院講切義理無虛日有講貫集至今行湖湘間其在興安剔蠹弊推豪強寬租賦凡吏胥久例白納

錢悉除之是行也雖勉為胡公穎數月留而田里至今
有遺愛其在福建諸郡累年之訟擬決一空其在朝六
館交賀得明師其奉祠而歸尚能訓其里以孝弟忠信
戶外之屨常滿先生雖以疾不及盡用於世其隨寓而
行每如此使其獲盡用當何如哉先生性資坦夷而質
直行已有法度與朋友交盡信鄰里有急難力貧給助
不遺力自十二三入鄉校諸老先生已驚異其文少長
力學經史諸子以及天文地理度數律歷之學靡不精

究平生著述甚富戊午校三山闕場者掠之無存今存於家者惟大學中庸春秋講義先生生於開禧丁卯五月甲午卒於咸淳癸酉正月癸未年六十七積階至朝奉郎娶馮氏封安人生男三人長欽祖將奏補遺澤次揚祖先卒次榮祖男孫二人芑孫萊孫是年十二月庚申葬先生於臨川新豐鄉白楊寺之原嗚呼天生一代奇士而乃止於此耶銘曰

謂天無意兮賦才何優謂天有意兮曷命不侔英靈

雖返於山川兮精忠尚凜凜於斗牛會復鍾為人傑
兮開世道之休

趙奉議墓誌銘

天祐我宋皇族盛大滿天下其家於信之鉛山者自少
傳諱士初始少傳為太宗皇帝五世孫其先四世皆封
漢王少傳始以德齒俱尊首知西外宗正生子八人皆
擢進士第有諱不迹者尤知名仕至華文閣待制累贈
銀青光祿大夫光祿生朝請大夫諱善闕知臨江軍贈

奉直大夫奉直之子是為奉議諱汝漢字文浩性坦夷
無城府篤學能詩文髭髯秀美與人交笑語出肺肝而
居官謹密所至有能名初尉定海制置使顏公頤仲屬
開河渠六十里以避江濤之險民不擾而利無窮定海
舊多寇公設方略擣其穴捕獲甚衆且請止戮其為首
者制置使大喜上其功公以改合入官為奉新縣丞攝
其邑事賑荒多所全活民謂公生佛丞無廳事已三十
年公捐俸一新之秩滿知南城縣會郡家督賦急公委

曲與百姓約一以信應之民用以安盜發南豐郡以屬
公公盡釋其脅從人尤德之通判鎮江府在總領所治
下舊苦煎熬公至處之裕然遷通判建昌軍攝軍事值
水後盜起公鎮撫不遺力忌者反以為言公遂杜門不
復出仕自號假庵讀書養性終其身其習熟於世德者
為何如使公得盡其用其增光前文人當何如哉然時
行時止存其在我若益長蔚乎本支之相扶詎易量也
耶公少學於華容丞王子明子明既死公出仕若滿解

而歸必酌其墓世多其厚德居鄉多義舉輕財樂施平生處事一斷於理無遲疑二三以至疾革尚手揮白扇精神灑然家事無大小區處悉定書之冊而卒時咸淳九年五月七日也得年六十有七娶周氏從姑之女也繼張氏忠定公孫繼朱氏晦庵先生孫俱贈孺人男三人長崇菱修職郎瑞金縣丞次崇擢漕貢進士以後其弟汝稷次崇樸女四人崇昭適其甥張庭蘭崇貴適三請鄉貢進士上官萬里崇慶未行餘尚幼孫男三人必

燐必妓寅僧必妓為堂姪全州通判崇柱之後是年某
月某日葬公西鄉招善都之長生坂公所預卜也銘曰
才之優足以行德之優退而藏存者長家其昌支之
茂本之強

艾隱先生林君墓誌銘

寶祐乙卯歲余應鄉書聞有高才卓識持衡風簾間者
是為林君桂發而未果識也余既竊第歸君來從事府
僕一見如平生歡而未由款誨益也後四三年再會君

吳門與語夜參半君袞袞談古今析義理如傾河漢不
可休知其學必有自來而未能悉也自是每見閩之士
必問君家世皆言君艾隱先生之子艾隱古學古心超
然不與世接君亦刻厲先志坐是偃蹇於世余於是益
敬之慕之又十年余歸自江西君適從事沿海制司之
幕因得請問艾隱先生詳委君乃愀然言曰宦遊日久
先君墓猶未銘正欲以屬之子余謝不能再三明日以
其狀來又辭至再三皆不獲乃敬為敘其事而次之先

生諱守道字守一自孩提已嶷然不羣恥與羣兒弄十
歲失怙恃卓有大志刻苦讀書蚤工詩賦年十五即嘆
曰破碎非吾學也改學經又歎曰破碎猶吾前日詩賦
也改從晦庵先生遊願聞大道之要裹糧束書至中途
聞晦庵計而返慨然閉戶力學精思家踐如及考亭之
門焉夫世之士生而讀書即以科舉為的既得之矣即
復渾渾利祿場至老死不知省其或能付得失於分定
知義理為先務又必得大儒為依歸開其所從入之門

而塞其所不必由之途然後知自拔於流俗如先生幼
孤自奮以詞賦破碎不為而改經學又以經義亦害道
不為而改求大儒為之師求之師不偶復歸而求之有
餘師譬之於水萬折必東不極不止非大丈夫而能爾
哉然則先生之視勢利為何如矣性剛直每面折人過
鄉間多畏憚不敢為非蓋其修身踐言所以率先人者
深也能豪飲飲至數斗不亂吟筆天成輒出人意表嘗
獨行冥思忽有所得大笑聲振山谷此皆竒氣之所發

見而世莫測也然則使先生而獲遇於世又當何如矣
家貧僅終伏臘而賦佃租特寬不擇美惡燥濕輒槩入
鄉父老以此德之桂發捧鄉書至謹以為積德之報而
不知此於先生未足窺毫末也嗚呼士患為科舉累不
志於道耳而先生志於道矣士志於道患質弱不足於
用耳而先生有奇氣矣士有奇氣患脫畧細行與人或
少恩耳而先生於鄉曲細弱盡情矣然猶卒不一遇於
世此命也於君何有而以得於外者為輕重哉然亦安

有積之厚者發不弘而必于其身也哉先生之先出比干比干以諫死其子堅避難長林山因以林為氏武王封堅清河林放從祀先聖封清河伯蓋襲堅之舊如雍如楚如不狃皆以名節見春秋左氏傳故春秋時林氏惟魯為盛其後林祿從晉元帝渡江遂為江南人祿十一世孫孝實守泉州又為閩人唐僖宗乾符二年有先輩公自閩擢進士第與衙推公兄弟並興子孫蕃衍故自唐以來林氏又惟閩為盛至昭宗朝有光州之固始

林氏隨王潮兄弟王閩者實在先輩公既顯之後人先生別族爾先生之父諱晞顏祖諱順夫嘗以三舍法升上庠曾祖諱團先生生於某年某月以端平元年十二月晦日夙興盥頰不疾而逝年若干淳祐元年十一月望葬茶溪之南娶陳氏方窳莫時陳氏猶在諸孤不忍預死其親不併為陳氏祔穴陳氏卒又不忍穴先生墓傍遂起義別葬子男三人宗旦如坦皆有文名桂發受業晦庵之門人信齋楊公復以繼先志登丁未進士第

今以沿海制司幹辦公事秩滿赴班孫男四人曰略曰
拓曰杼曰玉芝玉芝入太學桂發子也孫女萬全先生
多遺彙庚子闕多不存存者若干卷藏於家晚猶嗜
易積十年闕卦義濱死尚吟誦不輟易箬置易床頭

銘曰

於戲此艾隱先生林公之阡艾隱貴不以爵壽不以
年世有貴且壽於艾隱未必如艾隱之家之能世其
賢然則方來者其可量耶於斯乎可以觀天

處士張君孺人林氏墓誌

士非少長卓立必既達而後黽勉於善者雖賢不得稱
素行也士非父母俱賢必從師而後訓迪於善者雖美
質未必能少長卓立也嘉熙庚子夏余讀書邦庠同舍
張君澤民時年猶未弱冠每晚涼新浴衆方散步清談
澤民獨日誦古文不少休平居非公堂講肄足跡未嘗
出戶限余以是敬其少長能卓立知其必有自來者已
而澤民冠鄉書入太學擢進士第歷官所至稱才能人

人誦其父母之賢能教子余雖獨知之早反以官牒差池未果登堂以拜歲在戊辰始獲同官中都亟欲往拜之則其父已下世其母亦已老且病余悲之未幾余補員外丞以出澤民亦隨以母喪歸余又重悲之越六年澤民俄以其父處士及其母孺人狀來屬余併為銘余以疇昔所嚮往不得辭處士諱該字子博慶元府象山縣人本姓盛氏張之出也以盛之治命後舅氏始姓張父曰隸大父曰珍世有隱德孺人諱慈午姓林氏同里

人世與張氏俱鄉稱善人者也處士貲產悉以遜諸兄孺人替送唯謹處士母老奉菽水盡歡孺人順承唯謹處士居鄉急義有患難必竭力扶援孺人叶助唯謹澤民讀書處士課其程孺人躬緝績甲夜分燈澤民從師處士竭其貲孺人早夜預備其女裝澤民薦于鄉處士曰書不負人汝母得負書澤民及第歸孺人曰恨汝父不及見其母負父訓如其生及迎養孺人東嘉聞一施董聲為愀然不樂及其子為百姓雪死寃於臬事司人

或危之孺人乃大喜曰汝父亦慰九泉矣蓋其同心同德有如此澤民在上庠援恩典乞雙封二親命將下處士先沒孺人獨拜命處士以淳熙戊申八月十有一日生淳祐辛亥十月二十有一日卒享年六十有四孺人生於淳熙丙午之八月二十有八日卒於咸淳戊辰之十有一月朔壽乃至八十有三心同德同而命不同澤民與人言未嘗不墮淚然處士孺人之俱以賢稱者心也德也命在天者豈所計耶澤民家伏臘初僅僅足自

澤民策勲場屋遂貧自澤民登仕途益貧嘗調建康府
理曹貧不能將母不敢行京尹尚書潛公聞其賢而念
之禮致之幙下孺人竟卒于京又貧無以為喪凡棺槨
衣衾皆潛公賙給之潛公愛賢錫類之仁於是為不可
及而澤民夙受父母訓家庭之行益修取重當世其賢
又何如也處士生二男長榘孫早世次潤孫即澤民今
以法從諱賢交薦為紹興府諸暨縣女二人長適舒祥
卿次適徐祥發孫男五人女一人未行處士以寶祐甲

寅十有一月甲申葬縣之政實鄉西岡孺人以咸淳己巳十有一月庚申祔其兆甲戌十月始得礮石請銘銘

曰

父知教子矣母或掩其非母賢矣非父之甚盛德孰與開其基惟茲同德兮其合自天積慶于家兮洪河之源生不同封兮燎黃其駢生不同壽兮銘同萬年

余夫人墓誌銘

慶元府舊有訥庵先生余君以經學教授閭里從之者

數百人後多出為名卿才士余生也晚猶幸得師其門
人宗學諭王公貫道因亦得竊聞先生緒論及識其子
余君子容與其外孫薛君漫翁時端平三年丙申歲春
也去之三十有八年歲在甲戌余以奉祠里居漫翁忽
衰經踵門而告曰悲矣訥庵余先生之後盡矣吾舅子
容久已死今吾母又死吾母而不為之誌世無復有知
余氏者矣且吾母雖婦人其行有足稱者年二十五始
嫁嫁二年即寡家貧未有子勢不可一朝居吾母泣曰

使我此守薛氏之鬼餒矣立之子誓弗去未幾訥庵
門人有擢第歸求昏者母曰孀居命也否者吾夫不死
矣有勸者曰今嫁嫁官人非前比也母曰不得為官人
妻亦命也否者吾夫當擢第矣余聞漫翁言而悲之為
次其事而誌之余氏世為鄞縣人父端臣太學生訥庵
先生也夫薛與之故衡州使君某諸孫也子璉進義校
尉許浦都統司計議官即漫翁也夫人有明識幼能誦
論語孟子年十二能助其母理家政及力貧居寡奉祭

祀睦姻族教子讀書井井就條有男子所如其生以
紹興甲寅享年八十一以咸淳十年二月八日卒是年
十二月四日葬清道鄉潘嶼即其夫薛君墓側孫男三
人真老妙老觀老則為叔父後孫女二人皆未行初漫
翁困場屋游淮壅得勇爵歸夫人却不受拜曰我之所
以望汝者豈在此也漫翁自是益感厲思有以酬夫人
素志命猶未偶風木之悲已及漫翁為余言至此泣數
行下余聞其言益悲曰是豈容不銘也耶孀居者多矣

夫人獨食貧誓言死者五十有五年其節何如也不更二夫者有矣夫人以其夫不得官不忍改適他人之有官其識何如也母冀其子之貴宜矣夫人不悅其子以他途進必欲其以儒學進其志又何如也是皆可銘也而豈容不銘也耶銘曰

少壯嫠居操冰雪兮教子詩書志金鐵兮嗚呼茲其為名父之女歟庶幾乎烈兮

孫承節墓誌銘

杜牧自撰墓誌既沒未有改為之者也程太中自撰墓誌歿而填實卒葬歲月者治命也余鄉有承節郎監鎮江府丹徒鎮孫君亦自撰墓誌而歿其所親孫君某致其子鳴道之言乃屬余更為之余再三謝不可方君曰杜牧程太中文行昭當時其所自述乃皆平平此人所共信則因而用之可也今承節君坎埴平生而高自稱譽儻亦因而不改將誰其信之也余曰固也然自所誌不用而改屬之他人承節有靈其謂何且余與孫君

無一日雅故而輒更其所自誌果足以契其冥冥之心
否也辭又再三不獲則亦惟取其所自誌者而列之君
之自誌曰宋有不羈之士曰孫福翁其字叔和世為慶
元府慈溪縣黃郛人年十餘歲通九流應科舉不偶退
而編三皇五帝而下迄于五代名曰野史纂無極太極
以來至于時政名曰墨兵錄天地事物之變及乎品彙
流形名曰繁露凡百二十卷他作亦百二十卷壯而抱
劍游四方上督視史公籌邊十策調以歸州巴東尉笑

而去之歸而讀佛氏所謂大藏經又悉加之纂注夢游
香醉山因自號香醉山人大悟生死法常謂人曰甚或
大素氏之不仁也勞我以生生不足恃逸我以死死其
止止生本無生安得有死年既七十乃雕辭斧語立石
隧前慨然長喟曰地與天相軋火與風相射四海九州
太虛中一微塵耳安知其朽不朽哉凡皆孫君自誌之
畧如此越兩年乃卒實咸淳八年除夕年七十二咸淳
十年除夕葬黃鄭之盛山父名微云熙豐間參政名固

之後孫君謂其精於易預知孫君生為異人者也子男五人其女三人壻謝庭華李季和幼未行余觀孫君所自誌殆挾奇氣負大志流落困踣逃於佛而終焉者也故其語往往多驚人謂三皇五帝為野史謂無極太極為墨兵幼能博極羣書壯欲手縛強敵老謂四海九州雖一塵不如豈惟驚人且驚鬼神也自號不羈是真不羈者耶雖然終非凡子也銘曰

氣浩然兮如虹志矯然兮如龍命之不偶齟然兮談

空

朱縣尉墓誌銘

咸淳十年六月六日宗德縣尉朱君卒明年夏其孤屬
余銘其墓余惟君家世世讀書號更樓朱家其先宗玉
名戴氏禮吉先明易皆教授鄉里君之仲父監渠先生
和叔始以詞賦教授君髫鬣從之游年十二通科舉業
十七八馳聲鄉校二十三捧鄉書二十六再捧鄉書自
是無試不魁獨不利春官年五十七始以屢舉恩得官


越一年再薦于漕明年又不利春官越三年將之官俄以疾卒于家薦紳先生皆痛惜之君宏正灑落浩然不以世慮介其意人有用其文策勲者厚謝之毫髮無取年饑糴踴即下其價以廣施惠顧其器識自有足致遠大者至若詞華俊發行輩辟易無敢與並駕每一涉筆科屋兄弟師友姓名赫奕翩翩滿榜帖如大將出建旗鼓諸軍所向攻城略地無不立雋功其鋒又何可當也而乃止於斯非命耶世之僥倖致富貴者幾人撮拾人

緒餘僥倖高科者又幾人而君獨反制於命何耶然鄉
評物論藹乎惟君是歸於彼瑣瑣穢若弃唾彼雖幸而
得之內心終慚沮不自寧或終其身沒聲利如君厚其
積不計其報花竹滿前觴詠自適名教內樂地陶陶然
廣大巨量又豈命之可制也耶君諱慮字山甫居慶元
府慈溪之更樓曾祖祐免解進士祖汝明迪功郎汀州
司戶參軍父輝迪功郎致仕方氏其妣也娶亦方氏繼
胡氏子男四人岳翁泗翁聖翁梓翁皆能力學世其家

聖翁以後君之同祖弟祕嘗為餘杭縣學學官女三人長適進士顧國寶次適修職郎新紹興府餘姚縣尉范金次許嫁修職郎新婺州金華縣丞汪行道孫男二人景鳳景驥君生於嘉定五年七月六日得年六十有三德祐元年七月四日葬縣之德門鄉小桐嶼石湫之源初君之同祖弟祕與君同年薦於鄉同年推恩同年卒同年同日墓葬亦同其地銘曰

彼駑駘飽芻粟嗟其意氣何齷齪此天馬識者希然

其抱負何太奇有美人兮瑞世生不遇兮翩其逝同
其樂者誰歟塤鳴箎應死生與俱



黃氏日抄卷九十七